

U sboccu di i flumi d'Albitroni è di San Remediu chì s'impicciani in u quartiere di I Canni Mont



Corsica del Sud

Ajaccio 2008 / 2020

Da l'isuli sanguinari à i Salini

Situazioni : Ajaccio (70 817 abitanti in u 2018) hè a cumuna principali di a Cunità d'Aglumirazioni di u Paesi Aiaccinu (CAPA) si stendi annant' à una quindicina di chilometri annant' à a costa nordu di u so golfu chì vada da l'isuli sanguinari à punenti sin' à u sboccu di a Gravona à livanti.

À punenti di u centru-cità, a strada di i sanguinari hè supranata da u Monti Salariu (434m) induva i traconi facini prestu à empiasi quand'ellu piovi à riboccu. À longu à stu stradò, sti traconi traversani parechji strutture turistiche è risidinziali.

Più à u nordu, sò dui i ghjargali chì sorghjini à pedi di i muntagni chì sò più à l'insù. Quelli di l'Albitroni nasci in u pettu di a Punta di Lisa (787m) è quelli di San Remediu sottu à a Punta Pozzo di Borgo (782m). Pigliani manu à livanti sin' à impicciassi in u quartiere di I Canni è lampassi in mari. Stu quartiere, situatu à livanti di a città, hè fattu à palazzi alti è à stradi chì sò stati custruiti annant' à sti dui fiumi. Più à livanti, u quartiere più ricenti di I Salini hè travirsatu anch'ellu da ghjargali è traconi chì falani da a Punta Simeoni (240m).

I conchi di l'Albitroni-San Remediu è di a Madunnuccia scontrani u canali di a Gravona affussatu à u XIX^{imu} seculu è ogghj abbandunatu. À l'intrata di i quartieri di I Canni è di I Salini, i ghjargali ùn si vedini mancu più.

Inundazioni passati, tarritorii d'oghji in u mediterraniu



Intunillata di l'Albitroni à l'intrata di I Canni.



U quartiere di I Canni (à manu manca) è quello di I salini (à manu dritta).



Carta di i costi di l'Albitroni, di San Remediu è di a Madunnuccia. (Documentu DDT2A).

Danni annant' à a strada di I Sanguinariii.
(Ritrattu : cità d' Aiacciu).

Testimunanzi

I risidenti di a strada di i sanguinariii contani :

« Socu stata scittata vers 3 ori di mani da un frombu di spisciulimi. Pinsaiu à un rubinettu sarratu mali... quandu socu intruta ind'a cucina c'era dighjà 50 cm d'acqua. L'acqua hè cullata à spiccherà. Eppo u muru di daretu s'hè sfraiatu. Tuttu si n'hè andatu davanti à noi. Ancu di grazia avemu avutu u tempu di salvacci. Semu stati ospitalizati incù u me maritu... ùn avemu pussutu salvà nulla ». Una risidenti di u scudu

« À 2 ori è mezu semu stati scittati da un frombu sordu. In qualchi minutu, ci semu ritrovi i pedi in acqua. Avemu apartu a porta di metallu è l'acqua hè pussuta corra. Subitu avemu intesu i brioni. Unipochi di turisti, impauriti, stridaiani pà dà l'alerta ; d'altri erani aggruncati da l'impurtanza di u diluviu, immobilizati ind'i so stanzi ». Un coppiu di turisti Clienti d'un albergu

Aiacciu sott'à l'acqui u 29 di maghju di u 2008 !

U ghjovi a mani di u **29 di maghju di u 2008**, hè piossu assai annant' à u circondu aiaccinu. I pioviti si sò rinforzati in a siratina sin'à divintà pieni in a nùttata. S'hè arrighjistrata **189 mm d'acqua in a ghjurnata** à I Milelli sopr'à **I Albitroni**. Ùn era più accaduta dipoi u 1921.

Tuttu Aiacciu fù culpitu ma i **Sanguinariii** è I **canni** sò i quartieri chì sò stati tocchi u più. L'acqua è a fanga sò corsi à fiumara ind'i parechji alberghi di i Sanguinariii. **180 parsoni**, clienti è parsunali di dui alberghi, sò stati **sicurizati** cù assai difficoltà. Più à u nordu, nant' à a strada di **Capu di Fenu**, a strada hè stata dannighjata è **un ponti fù carriatu**.

I Canni inundati.

A situazioni ùn fù micca listessa listessa à I Canni ma u quartieru fù culpitu assai. Di a manera ch'ellu hè custruitu à palazzi, a popolazioni hè stata prisirvata ma i disguidi sò stati impurtanti. L'Albitroni hà inundatu parechji stretti cum'è a stretta Bonardi sottu à 1,5 metru d'acqua.

A stretta Bonardi vista da sopra u 30 di maghju...



...È oghji.
(ritrattu DDT2A).



Una vittura di i pompieri in un gattivu passu à mezu à l'acqua ritinuta pà u muru di u camminu di farru di u corsu Jean Nicoli.
(ritrattu DDT2A).



A stretta Bonardi vista di u corsu Jean Nicoli...



...È oghji.
(crédit photo DDT2A).



St'altezza si spiega pà **l'ustaculi numarosi** chì **l'acqua di a piena** hà scuntratu, à sapè :

- **Impachji** di canni à l'imbuttera di i ghjargali,
- Certi **palazzi custruiti in traversu di i ghjargali** com'è a barra Mancini
- U **riempiimentu** è u muru di a **via farrata** chì corri longu à u litturali, via Jean Nicoli, induv'ellu ùn c'hè cà un picculu scolu, sottu dimensiunatu à veru, pà fà corra tutta st'acqua.

Parechji **cantini, garasgi, cumerci** à pianu è parechji **veiculi (300 annant' à tutta a cità)** sò stati **sinistrati**. Qualchi impresa è u cullegghju di i Paduli sò stati anch'elli culpiti.

500 alloghji sò stati privati d'alitricità.

St'evenimentu chì hà assai cummosu l'aiaccini, ùn hà fattu, ancu di grazia, **mancu una vittima** annant' à l'insemi di l'aglumirazioni.



I pieni storici

Com'è l'urbanizzazioni hè assai ricenti in sti quartieri inundati in u 2008, pocu elementi storici sò cunnisciuti annant'à u passatu. Ma sapemu chì u quartiere di i Canni hè statu inundatu **di novembri di u 1990**. D'altrondi, a piena di l'Albitroni in u 2008, chì hà un debitu stimatu **trà 40 è 45 m³/s**, hè stata cunsidarata, sicondu i criterii di u PPRi di tandu, com'è un eivinimentu di **ritornu di 25 anni**. Hè bè a sottu misura di a reta di l'acqua piuvita chì spiega st'inundazioni più ch'è l'incertu ellu stessu.

Hè cusì chì a Città, cuscenti di st'affari, hà cumenciu travagli impurtanti ind'i sittori assai tocchi da a piena di u 2008. Stu prugrama ambiziosu si parsuvita sempri ancu avà incù investimenti finanziari impurtanti.



L'attori è i misuri di a gistioni dopu à l'inundazioni :

In u 2011, u Statu hà accitatu un pianu da privena i risichi d'inundazioni (**PPRi**) **pà a cumuna d'Aiacciu**. Cuncerna i conchi di **l'Albitroni-San-Remediu**, di a **Madunnuccia**, è di **i Valli Maiò** è di **San Ghjaseppu** chì traversani u quartiere di Petralba à u livanti di i Salini.

Hà parmissu di **defini** par ognunu di sti conchi, punti di **riferenza** pà i pieni **dicinnali è centunali**. U Statu finanza dinò un prugrama da privena l'inundazioni **PAPI (BOP 180)**. U **PAPI** chì corri, hè purtatu da a cumuna è unipochi d'elementi sò stati cunfidati à a **CAPA** ind'u quatu di a **GEMAPI**, privedi azzioni pà i quali a missa in opara corri trà u 2012 è a fini di u 2023.

Trà i sfarenti azzioni, a più impurtanti d'un puntu di vista finanziariu hè :

1. a ristrutturazioni di a reta di l'acqua piuvita è idrolica :

Annant'à l'insemi di a città, a missa in piazza d'una reta di 24 conchi da ritena l'acqua è lochi induva a piena si pò sparghja. 9 sò prugramati pà i quartieri di i Canni è di i Salini.

In certi lochi ci sò dighjà conchi naturali ma sò impachjati di vegetazioni o d'ingumbranti è sottudiminsiunati. Sti conchi anì capacità di **1 000 m³**

pà quella di Suartellu è **19 000 m³** pà quella di Peraldi annant'à a Rocada. Sarani tutti calibrati annant'à a piena di ritornu 25 anni di u PPRi. D'altrondi, i scoli è reti à l'inghjò di i conchi sò stati ridiminsiunati annant'à pieni trà i periodi **di ritornu 50 anni à 100 anni fà** (sicondu u PPRi di u 2011) sicondu i casi.



A conca Alzu di Leva l'annant'à a reta di i "moulins blancs", affluenti di u San Remediu, à l'intrata di i Canni. Sarà prestu accunciatu di manera à pudè cuntene 10000 m³ d'acqua.



L'apertura di a barra Mancini chì sarraia a strada di l'Albitroni.

Unipochi di sti travagli, com'è a creazioni di scoli, sò fatti in partinaria-tu incù l'Auropa è dinò incù l'Agencia Naziunali pà u Rinnovu Citatinu (ANRU). Hè cusì chì a barra **Mancini** hè stata aparta ind'u so centru di manera à lascià di più piazza à l'Albitroni pà corra : a so capacità hè stata duppiata sin'à u so scolu diminsiunatu pà a cuntunali è chì si lampa in mari.


2 l'amiliurazioni di l'alerta è di a gistioni di a crisa :

In cumplimentu di u so pianu cumunali di salvezza (PCS) è di i dati trasmessi da Meteo France (a Corsica hà un sicondu radar Meteo France dipoi u 2018), a cumuna hè aiutata da un sirvziu esternu d'aiutu à a decisionii pà a gistioni di i risichi idrometeorologichi.

3 U sviluppu di a cultura di u risicu : in più di a diffusioni in u 2021 di u so documentu d'infurmazioni cumunali annant'à i risichi maiò (DICRIM) rivisatu di pocu, a cumuna urganizeghja un prugrama largu di sensibilizzazioni à i risichi d'inundazioni fattu pà l'eletti è u parsunali cumunali, di a cumunità sculari (intarvinzioni in classa, rializzazioni

di DICRIM "ghjovani", missa in piazza di piani particolari di missa in sicurezza PPMS) è di u gran publicu (riunioni, cunfarenzi, missa in piazza di piani famigliari di missa in sicurezza PFMS). Infini, accant'à u PAPI, a CAPA animeghja a Strategia Lucali di Gistioni di u Risicu Innundazioni (SLGRI) cù i cumuni vicini.





2020, i Salini !

Ind'a ghjumata di l'11 di ghjugnu di u 2020, hè un antru sprufondu, curtaticciu ma forti (150 mm in 3 ori) chì tocca a cità.

U **quartieru di i canni**, sta volta hè statu **pocu toccu**. U timpurali hè passatu appena sopra è i cistari è i scoli dighjà fatti ani fattu u so travagliu. Ma à i **Salini** hè una piena chì hè falata longu à a via Noël Franchini chì corri davanti à a Madunnuccia. A piena s'hè **carriatu vitturi è pubelli**, inundatu piantarreni, cumerci è impresi, cantini è garasgi è un liceu. Ancu di grazia **ùn c'hè micca statu vittimi**.



A via Noël Franchini, à u nivellu di a stretta di i cigali, l'11 di ghjugnu di u 2020.

Creditu ritrattu d'insù : Philippe Casanova.



L'inundazioni smisurati di u 29 di maghju di u 2008 è di l'11 di ghjugnu di u 2020 in Aiacciu ani assai marcatu a nostra mimoria cullettiva. Pà risponda à st'evinimenti, è in qualità di merri d'Aiacciu è presidenti di a Cumunità di u Paesi Aiaccinu, aghju vulsutu, incù d'altri partinari stituzionali è privati, impignà una dimarchja glubali da privena i risichi d'inundazioni. Stu scopu, puru ambiziosu, hè di primura pà mantena l'attrattività è a qualità di vita di u nostru tarritoriu, parchi parmetta di riducia l'impurtanza di i danni fatti da l'inundazioni.

Tandu, ci tocca à pinsà à l'accunciamentu di a cità incù altri formi citatini più risistenti è alloghji megliu adattati à u nostru ambienti. I nostri cuncitatini devini, anch'elli, fà parti di sta pulitica di securità publica. Hè cusì chì a Cità d'Aiacciu pruponi atelli ver di u publicu ghjovanu, campagni d'infurmazioni è di sensibilizzazioni da parmetta di fà megliu fronti quand'elli ci toccani i danni è sviluppà una vera cultura di u risicu è di a securità.

Laurent Marcangeli, merri d'Aiacciu, presidenti di a CAPA

Stu documentu hè statu fattu da a Missioni Intarrigiunali "inundazioni Arcu Mediterrani" (MIAM) è u scagnu di studiu SUDALEA. Mudellu Éric Mégou, traduzioni Alexander Colvine.

Ringrazzi à : a Cità d'Aiacciu, a CAPA, Corse-Matin, a priffittura è a Dirizzioni Dipartimentali di i Tarritorii di u Pumonti (DDT2A), la DREAL Corsica, l' archivi dipartimentali di u Pumonti, Philippe Casanova

I ritratti di i quali u creditu ùn hè micca pricisatu sò di Jean-Marc Décombe/SUDALEA.

